

A polleta mantuda y o zaper chiquín (cuenter)

Chusé A. SANTAMARÍA

A polleta mantuda
s'ha escapau de casa,
diz que no li cuaca
estar-se en a jaula.

Os otros polletes
l'empuchan, l'escachan,
se l'ichan enzima
y cuasi l'afogan.

A misina atisfa
dende os tellaus,
olora a pizca fresca
pa minchar bocau.

Baxo un cañizo biello
ba a pasar a nuei
y l'espiaza o suenio
un zaper chiquín.

O zaper ye pincho,
una mica gorder,
chufra dica rinchar-se
porque ba a pleber.

Luenga & fablas, 1 (1997)

S'esgarrifa a luna,
s'espanta o muxón,
s'esmelica a polleta
de bier-lo pitón.

Chufra que te chufra,
a nuei s'ha pasau,
o zaper y a polleta
s'han enamorau.

Ya de mañanadas
de nublos escuros
por ixas fazeras
ban a tañer chuntos.

Bailan as fornigas
cantan os paxaros
y o zaper amuestra
o brinco de o zapo.

En ixas que yeran
prezipia a pleber,
toz s'esmoscoron
menos o zaper.

A pobra polleta
bien farteta d'augua,
chupida y con fredo,
pilló a calentura.

Dimpués d'ixe diya,
con o sol fitero,
a ormino se'n iban
de tiña masero.

Luenga & fablas, 1 (1997)

Asinas que o zaper
de tantisma sequera,
sin mullar os peellos,
ni chufiar podeba.

Al canto de a zequia
s'han feito a caseta,
l'uno ye en o paco,
l'atra en solanera.

Como bien lis preba,
la mar de goyosos,
con muitos besetes
han feito o casorio.

Iste ye o remate
de o cuenter de fogaril
de a polleta mantuda
y o zaper chiquín.